

凝陽董真人遇仙記

卷一 序

真人家世隆安本姓木虎俗稱董氏諱守志字寬甫號凝陽子元係女直人也父故不仕母夙喪娶女吳烈氏生一男二女以祖遊宦

陝右遂寓居終南山大定庚子府帖夜下揀閱軍徒後為謀克遷隴州汧陽鎮防因家焉真人性資淳朴氣貌恢弘幼而篤孝長而異俗雖隸戎行動作云為迥絕流輩志慕玄風而力不及行感遇正陽純陽海蟾三神仙察

其累劫修行迭作聞出明話前因力加點化故使抱疾拂亂其所為有司坐是為落軍籍真人緣此得專心於教門焉自是而後厥疾弗瘳蒙上仙分之刀圭及鍼其膏盲投以鐵馬星印而使之執持降以符水藥力而俾之濟世留詩以勸誘之賜酒以慰諭之或歷試其所行或提策其不逮或下臨於菴所或相逢於道中青天白日顯然見之其遇合未有如此之拳拳也真人自遇真以來棄俗出家結庵下志往來於德順秦隴間每每自悟隨

寓行緣信從者衆請藥而藥降瘡病而病愈言雷而雷作禱雨而雨應出神入夢示現代

人凡有起心動念者善惡必先知之發於歌頌見於詩詞出語驚人無烟火氣也真人於正隆庚辰年十二月二十八日生大定庚子

諱於軍籍明昌乙卯九月一日出戍於德順州南寨十一日辰時與衆會食間忽見一神人身長八尺許頂分二髻容貌紫赤鬚鬣盛美青袍草履仗劍造門而呼曰為汝隱於軍中故來相接何為不出真人驚起墜於床下

即時昏悶衆皆扶翼之至七日稍蘇四肢不能屈伸本寨千戶申至總押所遣官醫驗以為癱瘓遂得長假還歸汧陽本寨求治永安丙辰三月三日未時復見神人衣白袍於門首指面大笑真人就卧榻瞻禮忽然不見因問家人曰來者神人識之否答曰不識真人謂家人今夜甚要洒掃精潔庶幾神人再降救我性命家人如其言已至月望日夜半神人復降光明如晝異香滿室立於前曰為汝不省得此重疾特來救汝即於懷中取丹三

粒俾安三魂藥七錠俾定七魄語之曰服此

蕩散一切邪氣通身如火慎勿驚怖言畢遂失所在既服丹藥病果痊愈二十七日午時神人復降真人喜而拜謝神人曰汝識鍾否真人曰識是處官觀皆有之神人笑曰汝只

識撞的鍾不知聲從何來吾乃漢鍾離也為汝累世修行有缺功行故來賜汝鐵馬可隨身執持勿得輕棄今歲運氣人多疾疫吾又賜汝法水符藥可以救人補完功行汝可每旦焚香請藥吾降藥與汝真人依其言藥果

從空降下但有疾者服之必效凡請藥之際屢見神人現於空中至誠祈請之人亦有見之也真人每呪水必先自飲然後賜人治病日多飲水莫知其數人竟不能曉有緣遇之者真人必以詞示之丁丑年正月旦見一異人身長面黃髮頭跣足毛連蔽體麻繩繫腰兩手扮肩仰天而行勾於市中口云只化一錢與之兩錢者則云乞兒本來只化一錢安用兩錢既得錢即指而歎曰你却有眼只為四字教我等候一日但所化錢即以買肉將肉

并餘錢包之以紙齋至河畔以手掬沙土遂取所裹肉埋之復累土如塚栽柴一枝掛紙錢於上取棗梨獻于傍扮肩而坐俟觀者衆至指云喚棗梨你棗後怎生棗得梨後怎生梨得隨以兩手挿土至於埋肉亟力揚之口

云棗梨不得直待恁麼如此行化數月時人號扮肩先生真人與先生每相會輒話修真之事凡百爲喻冀化出家真人悟其言遂云弟子願隨先生云汝未可去待你去得時我將你去真人問曰敢問法姓先生曰黃面劉師也復問何方人也先生曰解州芮城人也又問以修行之事先生索紙而題曰斬罷三尸水望向西流到揚州恁時好抽頭一言有神一神有言神言不信人不可手言不顧形出言難追精定則氣定氣定則神住精氣神聚而不散真日用也又留頌云來也無修無形質去也無修無形質其中奪取造化機恁時方可是無爲真人深異其言先生自此別去真人每懷之八月中秋真人與衆習射相角勝負酒脯過傷故疾再作十月間隴州微

取驗以疾篤方落軍籍不復舊隱即日肩輿徑往白坡庵所甫及半載醫藥無效季冬生辰因自責云予重嬰疾若是聖賢有護耶何時復愈永安戊午正旦忽聞空中言曰既歸道矣敢食酒肉乎汝之疾端由乎此真人聞此語改過自誓不敢重犯至上七日午時有一先生黃面皂巾長髯布袍草履擔簦而來問曰汝所苦何疾真人告以腰膝爲患不能行履復問所患得幾時真人曰已及半載先生曰即刻鍼刺今夜子時乃愈不然則否遂扶起倚先生膝而坐遂揣穴施鍼先刺天門次及百會二鍼在合谷二鍼在湧泉鍼畢先生欲辭而去真人請姓字答曰劉止先生宿不可夜既分聞霹靂一聲真人愕然而起腰膝舒展病若拈去是夜大雪詰旦真人喜而掃雪至隣庵衆爲驚異皆知遭遇上真救療之力也永安庚申十月望日於汧陽佳庵忽遇向者神人真人急膝跪於前神人曰爲汝不能省悟吾先賜汝鐵馬今又賜汝七星寶印可作持修印馬者乃先天之物七星慧劍

也汝依法修鍊吾復提汝勿得漏泄記取真人拜謝問神人恍然不見泰和壬戌孟冬十七日寅時忽聞空中降語云三河口相會真人倉惶趨進行至盧川澗口岸之南見二神人已坐盤石即盤石二仙也真人拜跪於前鍾仙曰汝身垢膩太多何不入水中洗滌真人曰唯仙又指水中一大魚曰汝能捉否真人泝流而上搏之魚竟不獲又指一大龜曰汝能登龜背否真人勉力而登亦不能得二仙撫掌笑曰汝魚龜俱不能得待汝洗淨垢膩捉得魚龜吾復提汝汝望西南覩及仰視間二仙恍然不見於是出水穿衣望空拜謝而歸既至庵中覺遍體蒸熱如此彌旬每旦沐浴於三河頓然不食自覺有得於心常默然感於仙真也癸亥年真人既入道俗眷猶存室奚烈氏親見真人遇仙異跡遂割愛始得禮師出家乙丑年仲春望日夜見鍾仙降於土室中神光射人晃然如晝長跪於前仙誨曰汝母以藥與人恐悞人性命損汝功行吾前與呂仙會於三河今汝洗垢膩捉魚龜汝悟

其旨乎真人曰否仙曰垢膩者乃心垢也魚
龜者乃性命也大抵修行只要除垢止念靈
臺無物自得性命相守鍊成金丹脫殼飛昇
邀遊仙闕汝切記取因留行藥吟其辭曰勸
汝行藥兮於心無益貪救他人兮不覺自己
縱然賢可兮人皆道好若是悞殺子難還累
世似此行藥兮可不痛哉子細尋思兮經綸
不識吾今勸汝兮行藥勞神若不依從兮未
墮沉淪莫著聲色兮是非休說再勸於子兮
不得貪嗔巨古取骨兮何時得徹惜氣養神
兮固蒂深根改過歸正兮舊業皆消清淨無
為子與道合真受人供養子一心辨道若不
進道子萬禍臨身吾今訣破子省悟記取性
停命住子遨遊輕舉若不改正子一失未失
依此修行子吾來提汝復取小瓢傾酒賜之
既飲而冥然不省已經七日然後稍醒見土
室中功德幡蓋所須之物俱為灰燼滿室異
香不絕自茲厥後豁然大悟大安已已上元
平旦於沂陽忽聞空中降語云汝之因緣在
於德順切記切記真人亟出瞻禮了無所見

仲春二十五日至順德專誘門人盧自然出
家既見與語若合符契庚午年德順卓庵仲
冬七日夜色將分真人縱步前院仰觀乾象
適二仙乘彩雲而過真人驚惶易衣焚香見
正陽上仙青袍草履一仙面黃髯美皂巾絳
服正陽手托一仙右肩立於大杏樹下霞光
射目香風襲人真人拜跪正陽仙曰汝在沂
陽時有扮肩先生化汝數月不省悟汝以先
生為何人也真人曰當時先生云解州芮城
黃面劉也正陽指而笑曰即此海蟾公也後
於白坡庵有一先生與汝鍼法令汝病可亦
此海蟾公也為汝前生亦是修真之士吾與
海蟾亦曾提挈賜汝道號曰爽陽子法名遇
真吾今與海蟾再來明話前因復賜善號加
以和光老人法名守志又教汝三共之道水
火顛倒鍊金液還丹之法既濟黃芽枯水銀
不飛走之訣汞鉛凝結神氣相守之道即賦
詩曰全神養氣得身安汞鉛凝合自然入
聖超凡歸物外何愁不做大羅仙又曰吾曾
賜汝鐵馬七星寶印汝猶未省吾今為汝言

之吾昔以劍法傳洞賓令其執以修行今傳
汝鐵馬星印與洞賓一同因賦二頌云其一
曰七星寶印正當權復顯光明照大千鐵馬
祛邪能代劍龜蛇自是兩相纏其二曰七香
提挈大愚頑鬚髮蒼浪老却賢若是蹉跎歸
地府人身一失未難還海蟾仙亦留頌云前
世貧人號海蟾今來說破舊因緣不因累劫
修行到誰肯頻頻提挈賢又以五言長篇贈
之曰吾今說大道亘古人行少要固水銀訣
勿令後偷了清淨真無為鐵毫塵不擾黑雲
一點無湛然明月皎閉口牢藏舌六根盡除
掃北海黑龜見南山赤蛇繞洞中雪飄飄爐
鼎自然造鍊成無價珍同赴蓬萊島此乃修
真秘訣慎勿獨善兼汝有數子亦是前生法
眷汝曾於鸞鷲山登真洞集休觀建庵號曰
凝陽與通玄子陳信道為伴今谷神子馬善
能等為汝之門人同作修持登真洞乃張果
老仙隱通玄子即今之冰陽子陳知和也今
亦付之道號法名先令盟誓而後傳法方可
修行切記切記慎之戒之真人拜謝仰視二

仙復駕彩雲而升空矣於是真人復想二仙
 提挈前生之言忽然大省辛未年往德順遇
 真庵道友聞真人腹中雷鳴驚異請詩二絕
 以示道衆崇慶癸酉仲春二十六日與師叔
 陳先生歸汧陽天色昏暝黃塵障空至流江
 峽忽遇二仙正陽陳各乘花鹿而立真人拜
 跪正陽曰吾先付汝修真秘訣當夜事煩恐
 汝不明今復提汝勸化一切男女返真歸道
 可煉大丹養沖和自然之氣運用真水真火
 汞鉛凝結烹煉成丹若不煉心定意息氣養
 神如何得出離輪迴之苦莫起風波休生烟
 火若噴則神弱怒則氣散氣散則人亡人亡
 則未為下鬼何時出期陰符經云火生於木
 禍發必剋姦生於國時動必潰知之修鍊謂
 之聖人若人發大火火生則烟起烟起則不見
 形影暗中不覺損壞其身不可恣縱六賊三
 尸只要勤除彼馬屏去萬緣怕汝不信火剋
 金金剋木木剋土土剋水水剋火此是五行
 相剋之法又如金生水水生火火是地道順
 行即有生死只要水生金火生木此是天道

逆行豈有生死乎大抵修鍊決要養就水中
 金此是五行顛倒法若人見吾一面三世不
 墮地獄已後難見吾面切記切記若漏泄天
 機洩傳非人殃及己身罪禍必有如遇信心
 之人先盟誓狀當其祖先次可傳法真人拜
 謝間二仙已上升矣真人復四顧仰見一仙
 立於峭壁松石間適師叔至真人曰山間仙
 人汝見之乎師叔曰不見真人祝以虔懇再
 拜果見仙人皂巾絳袍現於松石間風袖翩
 翩迤邐而去衆雖瞻拜竟不得見師復迴德
 順時孟夏中旬也貞佑甲戌真人從德順往
 汧陽九月望日起發十八日到隴州宿南關
 未時分忽見正陽神仙立於河上問曰汝今
 何往真人亟拜而答曰弟子汧陽有土控所
 為人占奪今故幹此仙曰土控直錢耶汝性
 命直錢耶汝只識得土控昧了真空著了假
 空汝還不省隨海頑空真人告曰何者為真
 空仙曰真空者遍塞虛空不染不著一靈常
 在問識否真人曰不識遂以氣一嘘真人頓
 然省悟須臾失其所在行至汧陽惶恐不已

所幹之事更不敢言論至月餘復還德順遇
 真庵道友張二郎等問冬至一陽初生意旨
 若何師以詞贈之貞佑乙亥德順王進卿請
 真人齋畢送師至庵天已昏黑將欲告歸真
 人留宿不可真人曰汝可將香鐵馬歸樓上
 安奉若聞雷聲勿驚怖進卿一依師言夜坐
 昏睡忽然雷震震動樓屋柱礎幾拔滿家驚
 呼進卿不覺明燈視之進卿面上鬚鬚為火
 所燒家人呼起稍蘇翌日舉家具香花頂鐵
 馬送還庵中詳陳其事真人曰昨日雷作汝
 呼不省知其因乎汝樓上有一孽龍隱於樓
 壁掛刀中適值天雷收捉是時非吾鐵馬進
 卿歸而視之果見龍跡銷刀突鞘而去樓壁
 上爪痕尚存真人隨後顯化人莫識之也丙
 子年真人自洛水復還德順抵壽聖觀行至
 殿後松間忽遇二仙正陽陳曰吾於四海之
 內化為貧人口口勸人不回皆緣業障深重
 慳貪嫉妬作業越然奈何奈何吾有詞云日
 常行遊四海每日街前鬧處為乞口口相
 違化不回暗損精神只為凡情昧苦勸君生

死大頭奈頑愚作業貪心然不肯修真犯天戒墮落鄴都受苦無年代詞畢令真人闡化勸緣海蟾曰吾等觀見世間迷徒種種積業萬中無一覺知汝但見女男可以勸諭令人善道外修陰德內固精神若本性不昧於慾界真心自合於天道此箇幻軀假合四大何輕何愛吾亦傳汝詞云子細聽吾教誨說與門生莫把真心昧若是不除墮口債走入輪迴今世人身改髮髮蒼休得怪莫戀凡胎假合終須壞無事清閑鍊丹臺自爾純陽隨我蓬萊會員人受教畢拜謝問二仙遂失其所。在於是備云教旨訓及四方不數年教風隆盛無有不歸信也戊寅年門人盧自然等願聞印馬源流故以歌示之元光壬午仲春十二日夜及二鼓真人靜坐間忽聞空中霹靂之聲愕然而起得降語云汝之因緣已在隴地此處不可留心汝宜聽取真人出前院觀瞻了無所見癸未年隴州道友請師教化真人隨機顯現慈悲指人四方奉道者莫不忻然而仰慕者亦衆矣周圍建庵數十餘所道

風日盛宗門為之廣大矣正大乙酉大旱久不雨隴人請師作雨真人以生靈為心於是潛靜太虛天雨自至矣丙戌年貞元節謂門人曰我數四教指汝等生死事大辦道修真汝等於十二時中無一時在道受了十方供養虛度時光向前還他口債受苦如何當得但起意動念須要合於天心過去一切好人皆是福緣廣大自能感動天地神明大抵修行積功累行鍊性成真休歇無事萬緣不染真清真淨神氣冲和性命自然相守大丹自然凝結功成行滿聖賢自然接引汝等共我同伴能得幾時衆皆憂懼禮謝而退丁亥十月旦日揭庵名為養浩二十三日至二十五日祥雲覆庵霹靂數四異香滿空人悉見聞焚香請曰此何故也真人曰祖師邀我赴蓬萊之會吾將歸矣我昔遇正陽上仙時賜我印馬令我修行今將鐵馬付盧自然七星寶印付馬善能二人與我立教可為師牧與我當日傳法一同不得輕泄懈怠自然等告白素無功行不敢當克辭讓再四真人見不受

威形於色目光射人衆皆驚怖真人曰不以我教門為念輒相違拒二人悲泣不獲已而祇受真人呼衆門人即令拜靈陽子谷神子後遂索水浴既訖索衣真人曰不須綿絹厚服但布素單衣即可皆曰冬寒奈單袷何真人曰我來時著甚來遂服單衣坐而良久索筆留三頌其一曰陸地一法船舉棹數十年船棹都撇下我命不由天其二曰我有聚神法真火鍊丹砂無形亦無心認得祖阿麻其三曰通神變化造物無窮我命由我天地難籠頌畢囑門人曰待我歸後宜附隴下而已言訖正未刻儼然而化矣時丁亥十月二十五登真之後遭時多故藁葬於低村養浩庵越十二載戊戌門人靈陽子盧自然等歎日月之如流痛音容之愈遠遂自秦度隴權為移殯親造墳庵彷徨瞻禮親塚之北崖石上有瑞草一株狀若紫芝枝葉如蓋莖密蔓衍蔽覆墳土命衆開穴有聲如雷挽紼舉棺啓而視之顏貌如生周身之衣芒霜如雪異香質鼻周衣之棺奇花異草如刻如畫衆皆讚

歎不已翌日扶輿挽輓葬于隴底龜山之下時首夏十有三日也真人資稟不凡夙性穎悟真神仙中人也既獲三聖口傳而面命脫馳馬試劍之習而為修真鍊行之歸離抗塵走俗之形而為超凡入聖之舉向也不識之無今也筆則成書向也未嘗學問今也言則成文命意高絕於古今措詞暗合於聲韻雖博學多識文人才士有所不逮蓋其造詣極深修行極至聖賢不期而自佑詞章不學而自得宜與夫窺陳編以盜竊者大有逕庭矣門人靈陽子等親炙日久聞見日多得師流傳遺文詩詞歌頌總四篇為上中下三卷目曰和光集不敢自私自刻梓以傳於世別集真人出處遇真紀年一帙曰遇仙記尚庶幾真人昇仙證道之源流垂世立教之本末開卷而瞭然也故為之記

凝陽養真人遇仙記

諸師真誥

元始至尊號

鳥

志心歸命禮三界之上梵炁彌羅上極無上天中之天鬱羅蕭臺玉山京渺渺金闕森羅淨泓玄元一炁混沌之先寶珠之中玄之又玄開明三景化生諸天億萬天真無鞅數眾旋斗歷英回度五常巍巍大範萬道之宗大羅玉清虛无自然至真妙道元始天尊

上清號

志心歸命禮居上清境號靈寶君祖劫化生九萬九千餘梵炁赤書煥發六百六十八真文因混沌赤文而開九霄紀元洞玉曆而分五劫天經地緯巍乎造化之宗樞陰機陽卓爾雷霆之祖大悲大願大聖大慈玉宸道君靈寶天尊

泰清號

志心歸命禮隨方設教歷劫度人為皇者師帝者師王者師假名易號五天之道地之道人之道隱聖顯凡總千二百之官君包萬億重之梵炁化行今古著道德凡五千言主握

陰陽命書定用九五數大悲大願大聖大慈太上老君道德天尊

彌羅號

志心歸命禮彌羅無上天妙有玄真境渺渺紫金闕太微玉清宮無極無上聖無無復光明寂寂浩無宗玄範總十方湛寂真常道恢漠大神通宮者真老妙圓清靜智慧辯才至道至尊三界師混元祖無能聖主四生慈父高天上聖大慈仁者十號圓滿萬德圓身無量度人拔生死苦諸佛之師眾聖之王太上開天執符御曆舍真體道金闕雲宮九霄歷御萬道無為大通明殿昊天玉皇大天尊玄穹高上帝

天皇號

志心歸命禮紫微宸極句陳天宮九光寶苑之中五炁玄都之上體元皇而佐司玄化總兩極而共理三才主持兵革之權衡廣推大德統御星辰之躔次母失常經上象魏我真元恢漠大悲大願大聖大慈句陳上宮天皇上帝